

# Powšitkowne WOZJEWJENJA

njedźelu, 6. januara 2019

## Hodowny koncert w Chrósćicach

Tradicionalny hodowny koncert Chróšćanskeho cyrkwinskeho chóra wotměje so tutu njedźelu, 6. januara, w 14 hodź. w tamnišej farskej cyrkwi. Nimo skerje znatych hodownych spěwow zaklinča někotre klasiske překwapjenki. Koncert, na kotrymž tež instrumentalisća a młode talenty sobu skutkuja, budže Michał Cyž nawjedować.

## Worship-night za serbskich młodostnych: „There is more!“

Boha z wotewrjenej wutrobu přiwzać, jemu so bližić w modlitwje a spóznać, zo je wěra wjele wjace hač to, štož sy dotal dožiwił – k tomu maš přiležnosć na wječorku pod hesłom „There is more!“. Tón wotměje so sobotu, 26. januara, w 19 hodź. we Worklečanskim Don Boskowym domje. Worship je moderne wašnje modlenja, při kotrymž spěwajo Jězusa a Boha chwališ. Wšitcy serbscy młodostni su na mału worship-night přeprošeni, w kotrejž budže 148. psalm wažnu rólu hrać. Spěwać budže so w jendźelskej, němskej a serbskej rěči. Fokus je wědomje na Boha, Jězusa a na křesćansku wěru položeny. Podpěrać budu serbskich młodostnych młodži křesćenjo z Drježdžan.

## Termin putnikowanja do Krupki jasny

Putnikowanje serbskich młodostnych do Krupki budže wot 28. julija do 2. awgusta. Nadrobnosće so hišće wozjewja.

## Musical wo nakazanej milionarce

Rakečanski Paulusowy chór zanjese sobotu, 19. januara, w 19 hodź a njedźelu, 20. januara, w 16 hodź. we Wojerowskej Łužiskej hali musical „Die Millionärin“. W nim předstaja so žiwjenje Sabiny Ball (1925-2009), kotraž je jako čěkanča z tehdyšeho Königsberga bombowu noc 1945 w Drježdžanach přežiwila. Jako 24lětna je do Ameriki šla, zo by so na milionara wudała. Toho namaka, da pak so po džesać lětach alkoholizma mandželskeho dla wot njeho zaso džělic. Załoži komunu, zo by druhim pomhała so drogow wzdać. Zwěsći pak, zo trjeba sama nadžiju. Tu nańdže w křesćanstwje. Po politiskim pře-wróće wróci so do Drježdžan, zo by druhim nadžiju spožčała. K tomu załoži towarstwo stoffwechsel e.V.

Paulusowy chór, 2009 jako gospelowy chór Rakečanskeje ewangelskeje wosady załoženy, ma něhdže 65 sobustawow. Nawoda je Norbert Binder, kotryž je chwilu w samsnym domje bydlił kaž Sabine Ball. Zastupne lisćiki za předstajeni we Wojerecach měli sej zajimcy skazać pak pod čisłom (03 59 31) 20 224 pak pod (01 75) 26 33 692 abo z mailku pod [info@norbertbinder.de](mailto:info@norbertbinder.de).

## **Kurs k přewodženju ćežkochorych a mrějacych**

Nowy přihotowanski kurs k přewodženju ćežkochorych a mrějacych zahaji so srjedu, 6. februara, w zetkawanskim domje Carity w Kamjencu, Dróha jednoty 2. Wukubłanje přewjedu koordinatorojo ambulatneje hospicneje služby, zo bychu zajimowanych ludźi na tule čestnohamtsku službu přihotowali. Chorych a mrějacych přewodźeć je wutrobna naležnosť, tola słuša k tomu tež wěsta wěda, zo móhło so sensibelnje na požadosće jatra chorych a mrějacych reagować, skedźbnja Caritas. Pod hesłom „Přewodźeć nawuknyć“ ma kurs hač do 7. měrca trać – a to kóždy srjedu wot 17 do 21 hodź. kaž tež na dwěmaj sobotomaj wot 9 do 15 hodź. Přeprošeni su mužojo a žony rozdźělных starobow a powołanjow, kotřiž su na sobudžěle w ambulatnej hospicnej službje zajimowani, kaž tež wukubłani hladarjo chorych a starych ludźi. Přizjewjenja su móžne w domje Carity na Haydnowej 8 w Kamjencu, telefonowe čisło (0 35 78) 37 43 12. Tam dóstanu zajimcy nadrobniše informacije.

## **Putnikowanja z busom a lětađłom**

Tež lětsa přeprošuju zaso zajimcow na putniske jězby. Přěnja powjedže wot njedzele do njedzele, 23. do 30. junija, z busom do Toskany. Dalša putniska jězba z busom budže wot štwórtka, 3. oktobra, do wutory, 15. oktobra, do Lourdesa, Fatimy, Santiaga de Compostele a do Avile. Z lětađłom podamy so wot njedzele do njedzele, 8. do 15. septembra, na putnikowanje do Swjateho kraja. Nadrobniše informacije dóstanu zajimcy pod telefonowymaj čisłomaj (01 63) 7 33 82 05 abo (03 57 96) 9 54 28 (po 19 hodź.) abo pola mje w Hórkach, Sydlišćowy puć 2.

*Maćij Hadank*

## **Putniska jězba do Ukrainy**

Putniska jězba do ukrajskeho Lviva (pólsce Lwów, němsce Lemberg) wotměje so wot štwórtka do wutory, 8. do 13. awgusta, ze Šmitec jězbami w Radworju. Hłowne město zapadneje Ukrainy je ze swojimi stawiznami a kulturu wulce zajimawe. Wšako je w běhu swoich stawiznow přežiwiło pólske, rakuske, sowjetske a němske knjejstwo. Wobdžělmy so na swjatočnej Božej mši po grjekske-katolskim wobrjedže, wopytamy mniši klóšter w Univje, wobhladamy sej katolsku uniwersitu, póndžemy do opery a zetkamy so z wěrjymi woneho města. Změjemy přewod domoródnego kulturnika.

*T. Kubašec*